

LESA (SCUCHA) Y COMPRONDE TA DOS DIFERENTE COS

Un cos cu semper mi a bisa, ta cu ora bo ta lesa algo, compronde kico bo a lesa..... No lesa un cos y bay conta despues un cos cu bo no a lesa, bao di pretexto cu "mi a lesa tal cos."

Den scuchamento tambe ta asina..... No scucha un cos, y bay conta kico bo a scucha, siendo cu esey no ta locual a ser bisa.

Esey ta loke mi por a compronde di tur comentario cu mi a tende riba e conferencia di prensa di ASOMA diamars atardi riba e problema di cambio di banda 3 pa 9 of 9 pa 3 cu a trece e polemica cune.

Mi tin e grabacion di e conferencia cu splicacion di **Elgin Juddan** president di ASOMA, di su tesorero **Nelis Winklaar** (envolvi den e error cometi), **Miki Gravenhorst** comisario di Asoma (envolvi den e error cometi), **Tuyo Herrera** comisario di Asoma (envolvi den e error cometi).

Te eyan mi ta basa mi comentario di awe pasobra locual a sigui despues di e splicacionnan aki, ta locual a pone cu hende ta bisa cu **NADA** a wordo splica y cu tur cos a keda **MES BRUHA** etc. etc.

PRINCIPIO DI PROBLEMA

Despues cu lot a wordo tira, a bini e acuerdo entre banda di **Tuyo Herrera**, **Coco Loco Band**, banda di **Papito Rafael** (via nan representante **Eric Rafael**, ruman di **Papito**) y **Nelis Winklaar** pa cambia secuencia di 3 y 9.

Miki Gravenhorst cu ta stagemanager y tambe representante di **Asoma** den e asunto di tiramento di lot a splica cu "esey no mag".

Nelis Winklaar, a bay di acuerdo y a tuma e responsabilidad riba dje, pasobra **Tuyo Herrera** tabata interesa na toca mas trempa y hasta number un mes, lagando 9 cay, debi na su uso di "brass" na lugar di sequencer, y cu **Nelis** a compronde e situacion aki, y a bay di acuerdo cu e splicacion ricibi y tumando e responsabilidad riba su mes (keriendo cu e no ta cometiando ningun error y a mantene esaki tambe durante e conferencia). **Sr. Tuyo Herrera** a menciona cu **Sr. Nelis** a haci esaki di buena fe pa su banda por ta mas completo.

Nelis a pone e emisoranan presente na altura di e cambio aki riba e programa. Te aki **Miki Gravenhorst** no tabata tin nada mas di haber cu e asunto.

Nelis a tuma contacto cu president di **Asoma** kende a pone na altura cu e mester cambia e decision y pone tur cos back manera lot a dicidi, y **Nelis** a cumpli cu esaki tambe y tur cos a keda manera lot a cay.

Tur esaki prome cu 7 or anochi... E concurso mes a cuminsa 8 or anochi. Te aki nan e desaroyo di locual a tuma lugar y cu **Papito** su banda (**Cassenger Sweet Band**) a keda 3 y **Cocoloco** a keda 9 manera lot a dicidi.

E resumen di e splicacionnan aki, manera skirbi aki riba, ta muestra cu **NO TABATA TIN NADA** pa a haci e problema di un "vruminga pa un olifanti".

ELGIN JUDDAN Y SU SPLICACION

Den e conferencia di prensa di **ASOMA**, president **Elgin Juddan** a splica e desaroyo menciona ariba bon cla. Mi ta ripiti, bon cla... y tin grabacion di e conferencia pa demostra esaki.

El a laga sa ademas cu ora banda 3 (banda di **Papito**) tabata cla pa subi, **Sr. Casin Giel** a informe cu **Papito** ta bao di creencia cu ta number 9 e ta. Tabata tin un secuencia cu no tabata coregi.

El a yama tur lider di banda pa puntra exactamente si nan sa kico ta e secuencia. E secuencia den su man no tabata corecto.

El a splica cu no ta na su lugar pa stroba e anochi, splicando kico ta kico di lantamento di e concurso atrobe y cu aparentemente tabata tin un secuencia na hurado cu tabata robez y cu esaki lo por trece mas error. (e reunion aki cu e desaroyo ta locual a wanta e anochi pa como 40 minuut).

A keda dicidi su si **Papito** no tey awor aki cu ta bay anuncia **Cassenger Sweet Band** cu **Papito**, e lo wordo descalifica.

Aki mi por splica cu tabata na e momento ey cu a habri porta sali di e oficina (di container) cu **Papito** a subi trapi cu pañanan y sapato na man. E banda a subi mes ora pa prepara y **Papito** a cambia paña tras di un di e schotnan di stage.

"**Papito** a subi y pa mi e ora ey e problema no tabata existi mas", el a splica y a tuma contacto cu coordinador di huradonan **Capitan Quandt** y splike cu 3 ta subi y festival ta sigui normal.

CAUSANTENAN DI E PROBLEMA

Den e conferencia seguidamente **Sr. Juddan** a splica bon cla cu e problema a wordo causa door di 2 persona cu no mester a cambia lot

y tabata sa di esaki, y cu nan ta presente y a admiti nan error. El a laga sa cu error a wordo cometi y e como president di **Asoma** ta asumi responsabilidad pa su directiva pero no por asumi responsabilidad pa actonan erroneo cu a wordo haci pa un di e miembronan, y tambe cu tur hende mester por admiti nan error y cu e no tey pa tapa error y e ta aki pa papia verdad di loke a pasa..... El a muestra cu dos persona di directiva envolvi mester tabata sa mihor y cu normalmente nan mester saca nan conclusion y retira.

Aki despues a bin e version di **Miki Gravenhorst**, splica ariba caba y a sigui e version di **Nelis Winklaar**.

NELIS NO TABATA SA CU NO MAG CAMBIA LOT

Sr. Nelis Winklaar a splica di no tabata na altura cu no mag cambia lot manera el a laga sa.... E pida aki si a cay poco straño biniendo di un miembro di directiva y cu a keda cuestiona te cu ayera.

El a splica cu **Sr. Tuyo Herrera** tabata interesa di bay mas tempran y cu e ta carga e responsabilidad. El a splica cu ora cu **Robert Jean d'Or** a yame riba e asunto aki, el a yama **Sr. Juddan** mes ora y cu el a wordo bisa cu no ta cambia secuencia. Tambe el a splica con personalmente el a pasa di emisora pa emisora pa avisa nan di esaki y cu e secuencia ta keda manera lot a tira. Tur esaki prome cu 7 or anochi.

El a acepta tambe cu si medida mester wordo tuma e mester wordo tuma, pero cu pa su persona na e momentonan ey, e no ta kere cu el a haci un error y no ta acepta tampoco cu el a haci un error. "Mi a cumpli ora cu mi a wordo bisa cu mi ta fout bezig", el a bisa.

Pues den e splicacion aki riba, tur hende por nota kico a causa e problema cu mas bien lo mester tabata un problema chiquito, y cu a crece bira un monstruo for di diasabra te cu ayera y cu ta algo pa nos pone tras di nos y sigui normal cu nos celebracion.

Loke ta e problema y su desaroyo mester keda awor pa **ASOMA** y su miembronan discuti y pa esaki no pasa mas.

Versionnan lo tin diferente di tur banda, pasobra interesnan ta grandi, y como cu tabata trata di un concurso, e rivalidadnan (pa e concurso so) tabata tey sigur.

Hopi number di musico, banda, hurado, cantante, a wordo menciona, rabianan (di interes) tabata grandi. A existi retiro di directiva di **ASOMA** pa e causa aki; **ASOMA** a laga esey pa reunion general dicidi otro luna; y aki..... ban spera cu sano huicio lo prevalece.

LOKE A PASA CU DOS GRUPO DI HURADO.

Tabata tin tambe comentarionan riba 2 grupo di hurado. Riba e punto aki **Sr. Elgin Juddan** a splica y menciona number di e comision tecnico cu ta encarga cu trahamento di lista di huradonan pa final di tumba. Pa e prefinaalnan **capitan Quandt** no tabata disponibel. Pero pa e final si, y el a nota cierto cosnan cu mester a wordo delibera.

Sr. Juddan a splica cu di e lista cu tabata tin pa e final, a resulta cu e riba e lista ey tabata tin persona(nan) cu tabata envolvi directamente cu e concurso tambe cantantenan cu a participa den pre final.

Tambe cu hasta esun cu a busca hurado tabata tocador participante.

Esaki segun Sr. Juddan ta fout.

Capitan Quandt cu ta coordinador di hurado tabata tin un lista caba a base di neutralidad di e personanan pa hurado y esaki a wordo usa.

A bin dilanti for di diasabra asunto di buscamiento di hurado y cu e huradonan aki no a wordo acepta, pero esun cu a trece esaki dilanti, no a duna splica tampoco di e pakico no a acepta e huradonan.

Kizas e momento ey e no a wordo comunica tampoco riba e pakico, y e pakico a usa otro lista di hurado.

Te aki e asunto di hurado y tambe e asunto di errornan cometi of no, y cu lo a causa e asina yama "bululu" di fin di siman.

Hopi lo no ta di acuerdo cu e ponencianan aki riba, pero nan por scucha e grabacion bon pa compronde cu splicacion a ser duna claramente di henter e problema.

Loke a trece e confusion grandi cerca mayoria di hende cu a sigui e conferencia tabata cu den e conferencia a bin presenta personanan cu no tabata tin **NADA DI HACI** cu e conferencia di prensa.

Nan no tabata di medianan di comunicacion ni directiva di ASOMA.

Nan a cuminsa haci preguntanan, hunto cu otro preguntanan haci riba loke a wordo splica caba, y a bini un bruhacion completo cu e impresion a ser duna cu nada no a ser aclarea ni splica di e problema di tumba.

Un error a wordo cometi. A wordo splica motibo (nan) di e error. Responsabilidad a wordo acepta pa error(nan) cometi, esnan envolvi a duna nan banda di e pakico error a tuma lugar y e asunto a caba aki.....

Te otro aña na Tumba 2001

Juby